

22 NOV 2001

AGONG : JENAZAH TIBA DI KLANG 2.05 PETANG

KLANG, 22 Nov (Bernama) -- Jenazah almarhum Sultan Salahuddin Abdul Aziz Shah, tiba di Istana Alam Shah di sini pada 2.05 petang ini setelah melalui perjalanan sejauh 16 km dari Kuala Lumpur.

Setibanya di Istana Alam Shah, Perdana Menteri Datuk Seri Dr Mahathir Mohamad menyerahkan jenazah kepada Menteri Besar Selangor Datuk Seri Mohd Khir Toyo.

Jenazah kemudian diletakkan di atas pesada setinggi tiga tingkat yang terletak di tengah-tengah Balai Rong Seri.

Sejurus kemudian, Pemangku Raja Selangor Tengku Idris Shah mengetuai kerabat Diraja Selangor untuk memberikan penghormatan terakhir kepada jenazah Almarhum.

Ini diikuti oleh istiadat penghormatan terakhir oleh anggota-anggota kerajaan negeri, orang kenamaan, pegawai kanan dan rakyat.

Selepas istiadat penghormatan terakhir, istiadat permasyuran Sultan Selangor yang kesembilan dilangsungkan.

Jenazah kemudian akan dibawa ke Makam Diraja Sultan Suleiman yang terletak 1.7km dari Istana Alam Shah untuk disemadikan.

-- BERNAMA
RIZ MFJ MAI